

Atahma hla Mararah Awnano Thatih chyupa

Contributed by Rev. Sikhaw
Tuesday, 20 June 2006

Khizaw liata 100% krizy khaina rah he Mara rah a cha. Chavata Zisu dei he Abei chaipa a cha eima tah. Eima noto hro liata, eima khitlah ryureina liata, eima lyna nata mothlilahna liata chhao Zisu he beichaipa dyuchhai liata eima patyu tyhpa he Marapa eima nano chaina sakha a cha. Marapa ta eima Beipa hmia eima sieh hawpa vata thatihpha kyh liata bua khao hraoh mapi. Abeipa rei thailyma awpa dei eima bah. Zisu eima pahno tawh kozakha a pha haw vata pitlona la eima pangai laih haihi.

2007 liata eima tao awpa kozabi kyhchhi nata a zao pata thatih chyupa ei vaw roh.

Thatihpha tlah aw kheina:

1. Kozakhachho khazopa maniachhithana kyh he centenary gospel team ta hla nata bie ta tlah ama aw kheil yma. Sawhmo tlah zydua chahry pata Rev. Zodau nata Pupa Lai Hau choir leader nata centenary choir zy ta kozakha chho liata Abeipa eima cho liata a phana kyh he tlah ama aw kheil. Eima Beipa zisu cha Marapa ti nata lei lo, hmohro hneipa nata chyhsa zydua ta ama rei thai ly ma. Zisu moh dei ta he eima rah liata a sah chai.

2. Zao pheirah nata Mara rah thokha cha hry pata April 2006 chho liata Rev. Satu Ve U, Rev. Nokha, Rev. Sama, ngiapa lahpa hlupi nata Centenary choir chhao ta Kozakhachho Zisu eima cho liata a pha hmeiseih tahpa he tlah ama aw kheil heih. Zao pheirah liata ngiapa lahpa zy nata Zisu phana he hmao kha ama rei thai ly ma. KHazohpa cho liata ama lyna he rei tiapa cha vei.

2. Cha khai tawhtah Centenary choir he a pa ha lei ta si pazao ly ma ta India liata eima ngiapa lahpa mara unaw-sieta no zy nata Zisu phana he hmao khata rei thai aw pata Saiha ama za tlo. CD, zy tao thei nataihtha Khazopa ta Choir cha byhna a pie. Saiha No pawzy liata Abeipa bie rei ta centenary choir cha thata pa lyu paliha ama cha. Rev. Zodau nata Evan Ebi zy ta choir cha thlah pa loh ei ta Abeipa phana cha ama cha kheil yma. Abeipa eima ly via pa chai hei.

3. India mara, Saiha liata ngiapa lahpa Mara unaw-sieta no zy cha he kozabi kyhchhi he thlahpa kyhchhi ta khacha ama ngiapa. Vaih chata sapa nata thlahpa liata byhna cha thei naw pata kahvi lei ta noh 30, 20, 10 etc. tahpa ta thlahchhana ama hneil yma. Mothli tlana chota hipa chizy cha a pyu leima aw. Ama bie chaipa cha eima rahrao haipa liata Zisu y ryu vaw rei heila tahpa he a cha. Rah ryu reina (politics) liata Zisu he su pi ba si tahpa he ama chana ao a cha hra.

Kozabi kyhchhina liata eima pa rohnahsa chai awpa he Zisu moh he chasala, he tawhta eima kaw sie lai nawpa liata chhao Zisu moh he mara unaw-sieta no zy liata a sah chai maw sy.

Gospel centenary kyhchhi liata chysapa moh he eima cha lo tu khiah Zisu su hnei aw vei. Missionary zy (R.A. Lorrain nata chhokha, Carson nata chhokha etc.) eima ly hmeiseih. Zisu, Abeipa cho liata eima ly chai. Mara rah Gospel centenary thabypa he Zisu chata Centenary liata a vaw lyla tahpa he la Zisu liata hmaokha ta a ly kho su vei tahpa a cha. Missionary zy, kraws pheisaizy ngachhi kaw pata ama cha kaona cha eima hrona ta eima ly hmeiseipa a cha. Khizaw liata thatihpha vata a o tlyma lyu tlyma siesai ta a chakao hawpa, a chakao haipa nata a vaw cha kao laih awpa zydua cho liata chhao eima ly hmeisei.

Abeipa liata a ly chyu su vei. A phana he hmaokha ta rei thai via lyma su vei.